

## Romano Majer



Iz Sarajeva, 02.12.2000. godine, na svoj put u nebo nad Jerusalemom, otišao je bard geodetske struke gosp. ROMANO MAJER. Otišao je tiho i dostojanstveno, onako kako to čine ličnosti vrijedne svog života i djela.

U njegovih 89 godina, stalo je gotovo pola vijeka pregalačkog rada na razvoju katastarske službe u BiH, hiljade kilometara premjera zemljišta, puteva, šuma, njiva, šikara... .

Stala su dva svjetska rata, tmurne i duge 3,5 godine zatočeništva pod nacistima. Stao je i ovaj posljednji rat koji ga je napravio izbjeglicom i odvojio od njegove djece, unučadi, prijatelja.

Pun znanja kad je radio, pun duha kad se družio, pun razumijevanja kad je savjetovao, ostaće u sjećanju mnogih generacija učenika Geodetske škole, mlađih kolega i njegovih drugova. Uvažen i cijenjen, poštovan i priznat, ostavio je neizbrisiv trag u svim mjestima i gradovima gdje je službovao. Od Gacka i Ljubuškog, preko Bosanskog Broda i Banja Luke do Tuzle, Mostara, Zenice, Sarajeva. Za afirmaciju geodetske struke i svoj rad dobio je mnoga priznanja i pohvale od kojih su mu posebno drage bile Orden rada sa srebrenim vijencem SFRJ i Povelja zahvalnosti Republike BiH za vanredan doprinos u razvoju Geodetske uprave.

Potiče iz porodice cijenjenih i priznatih rabinera Jugoslavije i BiH. Odgajan u duhu jevrejske kulture, iskreno i nenametljivo čuvao je tradiciju i običaje bosanskih sefardskih Jevreja. Njegova duboka duhovna senzualnost, odredila ga je da zadnjih godina svoga života, predano radi na sublimiranju teološke građe kako bi jevrejsku kulturu i tradiciju približno bosanskom okruženju i pomogao boljem razumijevanju među pripadnicima različitih nacija.

Otišao je čovjek i stručnjak, vrijedan svog imena i struke, otišao je naš kolega i prijatelj na svoj put u vječnost a nama ostaje ponos i zadovoljstvo što je bio naš član.

Za sve što je uradio, neka mu je vječna slava i hvala.

*J. Benaček*